

MUNDO DI MUSICA

Skirbi pa Joy Kock

Dialuna anochi un reunion di caracter di urgencia a ser teni cu participantenan di OTI Aruba en vista di e cambian cu lo por tabata tin den e festival.

Ta asina cu e organisadornan despues di e evaluacion e situacion actual precario a tuma un decision di laga tur participante entrega un cassette cu nan composicion ariba.

Un jurado cu lo consisti di cinco expertos lo saca ocho finalistas cu lo mester a competi na Curacao dia 18 di Augustus pa saca representante pa e aña aki.

Tabata un pena pa e organisadornan publica e decision aki, mirando cu OTI semper tabata exitoso pa nos isla. Shete biaha consecutivo Aruba a gane.

Localmente semper e organisadornan a traha ariba forza propio, pues sin ayudo financiero. Na momento di representa nos isla internacionalmente ayudo tabata ser haya, pero parcialmente. E organisadornan a yega di haci sacrificacion grandi den pasado pa Aruba ta optimalmente representa.

Sin embargo e situacion actual casi ta haci imposible mantene e preseleccion cu ta carisimo. Despues cu e comunicado di prensa

a sali, hopi reaccion a cuminsa drenta.

Reaccionnan positivo cu a haci e organisadornan haya animo pa purba di salvaguardia e festival den su forma original. Den e reunion di urgencia teni Dialuna a wordo dicidi di mantene e festival di manera di costumbre.

OTI segun comentarioman di esnan presente, ta e unico oportunidad cu nos artistanan y compositornan a haya pa presenta internacionalmente cu e speranza di bira un artista o compositor internacional dependiente di e contactonan haya durante un festival internacional.

Limitando e festival na entrega di cassette ta kita tambe tur e contactonan cu e otro artistanan.

OTI, segun a ser treci dilanti, ta manera un fiesta frandi pa tur nos interpretenan, compositornan, arreglistanan, musiconan y directornan. Durante e reunion, Joy Kock a duna un splicacion amplio ariba e problemanan, pero al mismo tempo a muestra e deseo di mira e festival keda na bida.

Esaki ta di ocho aña di OTI Antillas y e ultimo di Antillas. Otro aña Aruba ta bay directo como pais ariba su mes. Tur nos

compositornan tabata cla pa duna tur cooperacion. Tur interpretenan ta den trainingnan maximal.

E entusiasmo ta grandi. E teamwork manera costumbre tey, y e organisadornan a dicidi di mantene OTI manera cu e ta. Sra. Mayra Maduro, directora di Tele Aruba a duna su green light pa "laga nos purba". Ted Schouten cu tin e produccion di television den su man, ta para positivo tras di e organisadornan.

Hopi trabao duro ta spera den e simannan venidero. Personalmente Joy Kock lo haci tur loke ta humanamente posible cu ayudo di e colaboradornan pa salvaguardia e festival. Hopi yamada telefonico a wordo recibi na cas pa encurashe pa mantene

e festival y e grupo lo trata di no defrauda tur esnan cu a yama nan.

Esnan cu a inscribi pa participa ta Mylene Marquez cu composicion di Jeffrey Franken, Francis Jacobs cu composicion di Howard Tromp, Connie Henriquez cu composicion di Rob Martis, Tommy de Cuba tambe cu cancion di Rob Martis, Yolanda van der Linden cu cancion di Efrem Benita, Efrem cu su propio composicion, Marcelino Paesch cu composicion di Rudy Herrera, Freddy Dirksz cu composicion di Jossy y Rudy Herrera, Don Ramon cu su propio composicion, Siegfried Codoy cu composicion di Gabriel Flores, Edwin Berkemeyer cu composicion propio, Krishnu Penso cu com-

posicion propio, Claudius Philips tambe cu composicion propio, Didi Wernet cu composicion propio, Chicho Kock cu composicion propio y Papito Rafael cu composicion di Oscar Serrano. Tin dos participante mas cu ta trahando ariba nan composicion y inscripcion a cera.

Dia 11 lo tin e preseleccion via Tele Aruba y dia 18 e final lo tuma lugar na Tele Curacao. Dia 21 di Septemebri lo tuma lugar na Sevilla España e gran final di OTI International. Un danki grandi, ta mucho hopi nombrenan pa menciona tur, na tur esnan cu a muestra interes y cu ta trahando hunto cu nos pa salvaguardia e festival apesar di e tempo un poco preta, ta loke e organisadornan a bisa.

INVOERRECHTEN Ariba INSTRUMENTOS MUSICAL

Instrumentos musical ta sali un musico aki na Aruba sumamente caro. Esey ta comentario di hopi musico cu nos a ricibi. Haciendo algun investigacion, nos a logra haya e porcentahe halto cu gobierno central ta impone ariba musiconan na momento cu nan order un instrumento den exterior.

Cuarenta porciento ta ser cobra pa instrumentnan como derecho di importacion. Di con gobierno central ta mire como luho?

Esaki ningun hende no por comprende. Ariba pick up o truck e porcentahe ta hopi menos, esta diezdos porciento. E motibo ta pasobra mester traha cu e pick up o truck.

Un auto di familia ta paga cuarenta porciento. Taxistanan no ta paga in-

voerrecchten at all. Pakico pasobra nan mester traha cu e auto.

Esaki ta un ley masha bon, pasobra Gobierno un taxista cu su entradanan y no ta castigue cu cuarenta porciento di invoerrecchten.

Pero ta na unda e ponencia a sali cu instrumentos musical ta algo di luho.

Instrumentnan musical ta un herment di trabao. Un necesidad pa un musico. Actualmente no ta cobra invoerrecchten ariba discos graba na Aruba, despues di hopi lucha. Pero e ta un ley temporal y por ser cambia un ora pa otro.

Cualquier grupo cu graba disco na Aruba ta haci esaki mayoria bez como un propaganda pa nan grupo. Pasobra nan no ta gana casi nada despues di paga studio di grabacion, compania diske-ro y transportacion.

Invoerrecchten kita ariba disco local ta encurasha gruponan pa graba y mantene nos cultura actual na bida. Awor ta cu kico

e musiconan mester toca pa haya graba?

No ta ariba un instrument? Esaki ta hopi contradictorio. Liber di impuesto pa grabacion, pero...cuarenta porciento pa trece e instrumento pa graba cu ne.

C'est la vie, mes amis! Laga nos spera cu drentando 1986 cu Status Aparte e musiconan lo por haya un trato justifica y suavisa e belasting halto cu tin ariba instrumentos y otro articulonnan cu un homber mester pa gana su pan honradamente, indiferente su profesion. Otro ridiculez ta cu nan ta cobra belasting, si bo tin un piano (un tempo) na bo cas. Ta con un alumno di piano por studia si e no tin un piano?


Nos ta comprende cu mester cobra belasting. Esey ta sigur. Pero no mester midi cu dos midi. Locual ta cobrando ariba instrumentos ta simplemente inhusto. Ley mester wordo ahusta cu e ta husto pa tur hende. No un mas cu otro.

Matrassen en Schuimrubberfabr.

Tanki Flip 14 - A

Nos ta traha TUR TIPO di CORCHON y BOX-SPRING na cualkier midi cu Bo ta desea.

Asta nos ta FURA CORCHON BIEUW den UN (1) solo DIA



Tur loke Bo mester haci ta yama nos na Tel. 22761 / 24710 / 32626

Y nos ta busce mainta y entrege atardi mescos cu nobo.

Asta cu 1 AÑA di garantia Prijs pa fura di

2 persona FL.70,-

1 persona FL.60,-

Reparacion matras di baby FL. 50,-

"SEMPER NA BO ORDO"

DIJKHOFF PESTCONTROL
Pa spuit Bo cas, plafond, cura of edificio contra di Tur sorto di Insecto (Houtluis)
Yama nos na 27271 entre 1'or y 5'or p.m.